

四庫全書

集部

欽定四庫全書

集部

竹澗集奏議卷四

詳校官中書臣孫溶

中書臣劉源溥覆勘

總校官知縣臣楊懋珩

校對官中書臣李奎

謄錄監生臣唐燦

欽定四庫全書

竹澗集奏議卷四

明 潘希曾 撰

治河十九首 本兵三首

疏支河以防水患疏

題為疏支河以防水患事臣奉命總理河道事務才薄而任重無任兢懼然不敢不竭其愚圖濟大事竊惟近年沛漕沙淤旋挑旋塞蓋由秋水泛漲黃河奔衝所致

嘗考河流故道非一其大而要者若孫家渡經長淮衛
地方趨淮入海其一也若趙皮寨經符離橋出宿遷小
河入海其一也若沛縣飛雲橋經徐州趨淮入海亦其
一也孫家渡趙皮寨乃上流之支河飛雲橋乃下流之
支河弘治以前三支分流會于淮而入于海故徐沛不
受其害漕渠不為所淤邇來上流二支俱就湮塞全河
東下併歸於飛雲橋一支下束徐呂二洪上遏閘河流
水溢為游波茫無畔岸於是決隄壅沙大為漕患今日

之計固當挑濬舊漕以通糧運加築隄岸以防衝決然
非疏上流之支河將來秋水復發沙雖挑而難保其不
復淤隄雖築而難保其不復決探本之論固有在矣近
因趙皮寨開濬未通該巡撫河南都御史潘塤等題稱
仍將孫家渡責成河南管河副使該戶工二部議題孫
家渡責成潘塤督行管河副使加意疏濬以殺河勢不
許推避誤事節奉聖旨卿等說的是欽此臣惟探本之
論正在疏孫家渡以殺河勢此撫臣經國至計而該部

會議相同蒙皇上斷然行之真明見萬里也臣私憂過計尤恐巡撫事繁副使力寡萬一疏濬遲悞未免貽患漕渠伏望皇上軫念國計下工部計議合無請勅一道叮嚀都御史潘埏即便嚴督管河副使調集黃河夫役選委相應官員上緊將孫家渡疏濬一應合用錢糧聽其便宜區處務令渡口深闊支河流行剋期成功臣仍公同本官閱實奏報庶幾河勢可殺而漕患可免矣緣係疏支河以防水患事理未敢擅便謹題請旨

治河疏

題為治河事臣本菲才誤蒙皇上采之廷推特勅總理河道事務既加憲職復聽便宜無非重國計而急水患也臣勉圖報稱夙夜靡寧本年九月中躬率管河郎中李重山東副使陳文沛兗州府同知花魁大名府通判郭從道徐州判官林桐等自濟寧放舟沛徐以觀被淤故道及所挑新河復沿黃河東岸陸行沛豐單等縣以觀大小決口奔衝之迹詢諸父老究其緣由乃知漕渠

廟道口以下忽淤數十里實由決河西來橫衝廟道口之上并掣閘河之水東入於昭陽湖以致閘水不復南流而沛縣飛雲橋之水時復北漫故沙停而淤耳沛以下即無淤者以飛雲橋之水南流故也計濟沛間漕渠只宜加築東隄以遏入湖之路更築西隄以防黃河之衝俾其自北而南常由故道自無沙淤之患雖舊日之淤猶有存者量加挑濬亦自通行已經筭付郎中等官李重等并續到河南副使周忠山東左參政邊憲會議

得單縣林臺集至沛縣舊城隄一百四十餘里相應脩築長隄則民地得免淹沒運道可保無虞又經督行各該司府議處及轉行各處鎮巡知會臣思脩隄備患事不可緩而地方災傷民不堪役及今糧運未行河道人夫空閒乃會計工程量調附近河夫二萬餘名每名照依則例日給銀壹分五釐犒助今冬做工二箇月至十一月中暫放來春做工二箇月至三月中可完又查得本年七月九月間黃河水漲二次皆得趙皮寨分流但

水落寨口微淤仍責河道官夫隨淤隨挑以備分殺及
照孫家渡係彼處撫臣督濬亦就查催以憑閱視仰仗
朝廷洪福欲俟稍見功效方敢陳奏近准工部咨該本
部具題奉聖旨你部裏說的是河道事情已命侍郎潘
希曾提督整理不必再差官員還行與他著用心經畫
區處應奏請者具奏定奪欽此欽遵臣感激聖明委任
懼無以副宵旰憂勤之萬一謹昧死言臣既愚且拙不
敢求新奇之功不敢為苟且之計區區報國之誠惟欲

因舊以為功從省以濟事順水性以除患故捨新河而
脩舊漕者圖其易也沿黃河為隄者防其傍溢使順流
也隄去河五六里或七八里者因地勢也停槩派十數
萬夫僅用河夫二萬餘者恐民勞也罷顧募而行犒助
者慮錢糧難繼也依次而挑舊淤培東隄者審其時也
查濬趙皮寨孫家渡者以昏黃河故道亦先朝所嘗濬
也夫漕渠之淤因黃河之傍衝黃河之衝因上流之未
疏察其事勢參諸廷議莫如脩漕隄以防衝決疏支河

以治本源臣盡心竭力猷為止此然未敢自信也伏望
皇上軫念河患特勅工部會官詳議或俯察邇言或別
示長策使臣得一意行事庶於國家大計可無誤也緣
係治河事理未敢擅便為此具本專差承差厲思智親
齎謹題請旨

謝恩疏

奏為謝恩事嘉靖八年正月初六日承差劉堯臣於本
部順領頒賜明倫大典一部到臣除望闕叩頭捧受外

伏以惟聖盡倫不越因心之孝惟皇盡制必稽知禮之言大典肇脩彛倫攸敘揭中天之日月開流俗之昏迷盥手啟編荷恩增懼誦敷言而會其有極由孝道而移以為忠臣不勝感戴天恩之至為此具本專差承差任舉親齋謝恩謹具奏聞

自陳求退以彌災變疏

奏為自陳求退以彌災變事邇者地方多災星彗迭異皇上宵旰靡寧克謹天戒在廷羣臣罔不省躬待罪臣

本菲才謬膺治水重寄多方脩濬所至勞費迄今半年未得成績蓋羣臣中宜早退者也伏望聖明將臣罷歸田里別任賢能則天工不曠而天意可回矣緣係自陳求退以彌災變事理未敢擅便為此具本專差承差劉堯臣親齎謹具奏聞伏候勅旨

乞命憲臣兼管河道疏

題為乞命憲臣兼管河道事臣惟黃河自河南泛濫歷千餘里分三數道趨徐淮以入海先年河溢開封大名

曹州地方嘗脩沿河一帶長隄以保運道而在開封者則屬之河南管河副使在大名曹州者則屬之整飭曹濮兵備兼管河副使分任責成有備無患近年河溢豐沛徐地方兩淤沛漕一淤徐州洪又淤淮安清河口即今疏上流於河南以分其勢築長隄于單豐沛以禦其患惟單縣係曹濮兵備官該管而豐沛徐淮黃河缺憲臣管理事難責成看得整飭徐州淮揚兵脩副使吳昂常在徐州住劄前項河道堪以兼管乞勅該部計議請

旨令徐州兵備官兼管豐沛徐淮黃河凡人夫工料防守脩濬之宜照依開封大名曹州整理以後仍載入本官勅內則河南山東直隸一帶黃河皆有憲臣分管而運道可保矣緣係乞命憲臣兼管河道事理未敢擅便為此具本專差承差張譽親齎謹題請旨

脩長隄以保運道疏

題為脩長隄以保運道事節據山東按察司管河兼整飭曹濮等處兵備副使陳文沛呈據直隸大名府管河

通判郭從道呈蒙本道案驗奉欽差總理河道事務工部右侍郎兼都察院左僉都御史潘希曾劄付坐委卑職督領本管人夫脩築豐沛長隄工程竊照前項創築之隄為防西水衝噬之患自沛縣淤塞運道以來無人不欲興築此隄者也今隄功報成足以為經久之計矣合無照依直隸山東事例或設老人或置鄉夫時常巡邏看守則隄功不致損頽而運道可保無虞等因到道查得直隸山東河南三省一帶黃河北岸先年設有長

隄月隄以防水患兩畔插柳一以護隄為長久計一備採稍為河患用又每三里蓋鋪一座撥夫看守仍設老人往來巡視合無備行單豐沛三縣將一帶新隄照依前項三省舊隄規矩等因到臣看得三省舊隄連接五百餘里外防黃河內保運道各設管河副使同知通判主簿等官管束河道人夫栽插楊柳採辦椿草看守鋪座脩填隄岸每於夏秋水發之時併力捲埽防禦河患遇有淤淺亦就挑濬近年河決單豐沛地方沙淤沛漕

該臣議築三縣長隄一百四十里續據單縣官民申呈
增築長隄至本縣戴富家後共一百五十里蓋造隄鋪
凡五十座所以防黃河而保運道與三省舊隄事體一
同今單縣河道係山東管河副使該管豐沛河道已經
題准係徐州兵備副使兼管惟州縣管河官員及守隄
人夫尚未議處謹將應設官夫查照舊隄事例參酌地
方事宜開款于後伏望皇上垂察特勅該部計議施行
則長堤可垂永久而運道無虞矣緣係脩長隄以保運道事

理未敢擅便為此開坐具本專差承差張譽親齎謹題
請旨

計開

一兗州府單縣河道官夫查得本府城武縣近年
河患已遠管河主簿郭景輝在任事簡乞將本官
改注單縣管河就將單縣均徭河夫二百二十九
名隣近金鄉縣均徭河夫一百六十八名令其管
領守隄每三鋪設一老人巡視平時脩隄挿柳採

辦椿草夏秋水發之時聽本府管河同知調度於
緊要處所併力捲埽以防河患其城武縣河夫仍
聽同知總管則官免增設夫免加僉而事亦有備
矣

一徐州豐沛二縣河道官夫查得本州管河判官
例該沛縣住劄宜令兼管豐沛黃河沛縣管河主
簿宜令兼管本縣黃河豐縣欠管河官乞照例設
主簿一員令近隄住劄就將蕭縣近年僉復閘溜

淺夫并原存淺夫共六百二十七名碭山縣近年
僉復閘溜淺夫并原存淺夫共三百八十二名分
撥豐沛二縣主簿各管領守隄每三鋪設一老人
巡視平時脩隄挿柳採辦椿草夏秋水發之時聽
本州管河判官調度如或不敷量調徐沛運河人
夫於緊要處所併力捲埽以防河患則官不缺人
役不擾民而事亦有備矣

一查得徐州洪閘官夏時先經總理河道侍郎章

拯薦其警敏知事令同沛縣主簿寧時智往來脩
濬該本部覆題各官果能盡心職務河患平息聽
總理河道官奏請量擢自去年冬臣委本官於豐
沛地方捲埽脩隄尤能效勞成事且熟知河患可
使防守如蒙准設豐縣管河主簿乞將夏時陞補
則河道亦有賴矣

異常大水幸保運道疏

題為異常大水幸保運道事節據河南按察司管河副

使周忠呈據開封府同知閻祺潘國臣呈嘉靖八年六月初五日據管工義官孟雷報稱本日子時黃河泛漲將孫家渡口衝決灌入新開河內隨帶本官親詣孫家渡相看河水委實洪大奔趨本口順流滿漕而下其深大約丈餘隨有木客郭愷郭亨等木筏三十餘座亦隨水而下通流無阻又據開封府蘭陽縣申本年六月初五日黃河泛漲水發一丈本日亥時將新挑趙皮寨河衝開見今通流又據直隸徐州沛縣申本年六月初七

日卯時水勢陡漲出岸衝入街市午時水至縣門夜三鼓將察院倉庫監獄六房各官宅舍渰倒卷案般救不及儒學文廟西廡櫺星門諸生號房教官宅舍亦被淹倒黃水平有三尺又據委官城武縣主簿郭景輝稟報沛豐長隄本月初七日辰時黃水溢出岸上流至隄下深者五六尺淺者三四尺瀾漫洶湧掃衝隄埽乞行相度防護庶保無虞等因各到臣竊照今年五月以來兗濟地方雨水大發近日黃河泛漲尤甚決孫家渡灌趙

皮寨渰沛縣漫長隄三日之間千里并至除沛縣拯恤
事宜係撫按衙門施行外有得長隄初成而黃河驟漲
賴脩築頗堅不被衝決隄裏田廬免于渰沒而濟沛一
帶漕河由其故道黃沙無自來淤塞不復作即今糧運
通行水勢漸平且孫家渡既淤下流受害連年挑濬工
未及半一旦自決而通夫豈人力皆由我皇上憂勤一
念仰格天心故天相成功渡口久塞而忽通長隄甚危
而獲安也臣仍行河南管河官俟黃河落後查勘孫家

渡趙皮寨二河如有淤淺之處量加挑濬以脩分疏及
行山東直隸管河官將單豐沛長隄再加脩培以垂久
遠庶運道自此無虞矣緣係異常大水幸保運道事理
為此具本專差承差任舉親齎謹具題知

議處河道官員疏

題為議處河道官員事據河南按察司管河副使周忠
呈稱孫家渡開自弘治六年迄今脩濬不知凡幾但既
濬之後水或暫通而不復為脩沙旋淤塞賀村以下今

改須水流入則浮淤自可蕩滌惟渡口二千五百步水落泥積宜時常脩濬合於鄭州添設判官一員責令渡口住劄就將該州并所屬四縣河夫共九百七十六名分作兩班每年量調一班自二月初興工三月終止如或積泥頗重用夫數多將該州并屬縣年例僅夫二百名調撥協濟庶民不久役而水可常行矣又稱儀封縣先年因黃陵岡衝決添設主簿一員專管河事近年河患已徙於紙房杜勝等處係隸東明縣地方見今員缺

似應裁革等因到臣看得孫家渡既已挑通必須專官
管理庶免復淤其儀封縣管河官委的事簡可省及查
得虞城縣縣丞李希蕙年資久而守不渝脩濬勤而績
已著用之管河足以稱職乞勅該部計議合無將儀封
縣管河主簿裁革於鄭州添設管河判官在孫家渡住
劄管束該州并屬縣河夫以時脩濬仍查訪縣丞李希
蕙如果相應就以本官陞補鄭州判官則河道有備而
官使亦得人矣緣係議處河道官員事理未敢擅便為

此具本專差承差任舉親齋謹題請旨

及時疏河以防水患疏

題為及時疏河以防水患事據河南按察司管河副使周忠呈報挑濬過滎澤縣孫家渡自本渡口起至鄭州地方姚店止長三十三里一百四十三步於本年六月三十日工完又自渡口西北挑濬舊河形長二千二百步於本年十月初二日工完河水通流船筏往來等因到臣查得先為疏支河以防水患事該臣具題奉聖旨

是潘希曾所奏漕河壅塞原委明白甚為有益足見用心使寫勅與都御史潘埏着嚴督管河副使調集夫役選委相應官員將孫家渡上緊疏濬務在深濶以殺河勢功成之日還著潘希曾閱實具奏工部知道欽此嘉靖八年四月二十六日准工部咨為應詔陳言以彌災異事該本部題議得治河通運國計重大夏秋水漲正在春暮用工不宜停罷如果人民災困支給在官夫價多方遠糴救其饑餒督其工力務使河工不誤而民命

兩全奉聖旨是這工程事干運河着巡撫官會同督理河道侍郎潘希曾公同計議從實具奏定奪欽此本月二十八日隨准工部咨為及時疏河以防水患事該本部題近查巡撫河南都御史潘壘奉有欽依致仕遺下前項脩河工程無官督理況今四月將終正在緊急用工之際合無降勅一道星夜差人齎付彼處巡按御史胡效才將都御史潘壘遺下一應治河事務通行嚴督整理仍一面行文本部右侍郎兼都察院左僉都御史

潘希曾亦要不妨運河往來總督整理不得因而推託
誤事其巡按御史奉勅以後河功懋著比之潘埧事有
成效聽侍郎潘希曾具奏上聞奉聖旨是治河工程依
擬寫勅與巡按御史胡效才嚴督管河等官越時整理
通行侍郎潘希曾往來公同督視勿得推託誤事待巡
撫官員到日另行具奏定奪欽此臣欽遵節行管河副
使周忠嚴督官夫如法挑濬及親詣孫家渡閱視外看
得去任都御史潘埧督過工程僅及三分之一御史胡

效才奉命接管乃能究河道之始末念工力之繁難議處
錢糧人夫選委官屬督同副使周忠及時經理又於河
漲口決之後察其水落沙淺之形加力挑通為國遠計
使河流分於上而運道安於下且頻年難成之功四越
月而告成厥功懋矣乞勅該部議處合無將御史胡效
才副使周忠量為陞賞庶以勵賢勞也除巡按衙門徑
自造冊奏繳外緣係及時疏河以防水患及節奉聖旨
功成之日還着潘希曾閱實具奏并節奉欽依巡按御

史奉勅以後河功懋著聽侍郎潘希曾具奏上聞事理未敢擅便為此具本專差承差劉世臣親齎謹題請旨

河功告成疏

奏為河功告成事據委官管河郎中丁洪李重管閘主事李邦直山東管河兼漕濮兵備副使陳文沛兗州府同知陳約徐州判官溫文標等各冊報築過黃河北岸長隄自沛縣舊土城起歷豐縣至單縣戴富家後止共長一百五十里一百二十二步下埽二千三百九埽嘉

靖八年四月十七日工完造過隄鋪五十所每所瓦房
三間共一百五十間本年六月二十一日工完濬過沛
縣至濟寧運河淤淺九十二處共長三千八百丈五尺
培過隄岸缺口七十二處共長一千九百五十丈三尺
脩過橋壩共一十三處本年七月初六日工完幫過長
隄一百一里二百二十四步加埽二千四百三十一埽
本年十一月初四日工完委役過官弁吏老等役二百
八十四員名人夫二萬九千二名匠役一百一十九名

船戶四百八十三名動支過原脩河并河道銀共二萬
六千九百一兩五錢一分七釐一毫五絲原脩河米豆
共一萬四千五百七十八石四升五合二勺椿木杉條
共一萬五千二百四十四根草葦柳稍雜柴共一百一
十一萬六千六百二十一束柴繩草繩共一十三萬二
百一十五條棘麻廢纜舊鐵器共一萬六千六百九十
二斤輓瓦共一十二萬一千八百箇石灰五百石又據
河南管河副使周忠呈報濬過趙皮寨口本年六月二

十六日工完濬過孫家渡三十三里二千三百四十三步本年十月初二日工完各到臣節該欽奉勅近年沛縣迤北漕河屢被黃河水漲衝開隄岸河流淤塞朝廷恐阻滯糧運節命侍郎章拯都御史盛應期等會同督理未見成功該廷臣會推爾素有才望特加憲職命爾前去督理該本部覆爾所奏以孫家渡為上流支河必先疏濬以殺河勢然後可以施功誠為有見已勅都御史潘墁嚴督管河副使等官用功疏濬爾可作急前去公

同淮揚鎮巡及山東河南北直隸撫按官督同各該三
司掌印及管河守巡等官親詣沛縣等處相度河勢斟酌
計處待孫家渡疏濬成功之日然後以次隨宜舉行
或挑濬舊漕以通運道或脩築隄岸以防衝決凡事干
河道勅內該載不盡者悉聽爾便宜處置事體重大者
具奏定奪爾為大臣受茲委任尤須竭忠盡力多方咨
訪悉心區處務在日下成功欽此欽遵臣議得沛漕之
淤塞因黃河之傍衝黃河之傍衝因上流之未疏今宜

疏支河以殺其勢築長隄以防其衝然後挑通沛漕自無復淤之患乃先請勅河南撫臣督濬孫家渡續行河南管河官加濬趙皮寨口一面督行各該司府議處及轉行各該鎮巡知會分委郎中丁洪李重副使陳文沛周忠等查調河道官夫支放合用錢糧起築長隄于沛豐單三縣蓋造守隄鋪舍候過暑雨仍加幫培又委主事李邦直管濬沛縣迤北漕河培補隄岸脩置橋壩仰賴皇上洪福一年之間各工次第報完支流疏於上而

黃河之勢以分長隄障於下而黃河之沙不入沛漕挑
通糧運徑過雖六月八月兩經大水無復淤塞之患矣
除趙皮寨係本處河夫如常挑撈孫家渡係接管御史
胡效才造冊奏繳外今將報到長隄并沛漕工程緣由
查算相同除備造文冊畫圖貼說外緣係河功告成事
理為此具本專差承差張譽親齎謹具奏旨

計開繳

河功文冊一本

畫圖貼說一本

旌舉賢勞官員疏

題為旌舉賢勞官員事先准工部咨內開本部右侍郎
潘希曾奉命總理河道重務其河南山東直隸都布按
三司并府州縣衛所等官有諳曉河事者從其選委事
有成效聽本官從公舉薦等因具題奉聖旨是欽此欽
遵該臣議得沛漕之淤塞因黃河之傍衝黃河之傍衝
因上流之未疏今宜疏支河以殺其勢築長隄以防其

衝然後挑通沛漕自無復淤之患乃請勅河南撫臣督
濬孫家渡及行河南管河官加濬趙皮寨口分委郎中
主事副使同知等官一面起築長隄于單豐沛三縣一
面挑濬沛縣迤北一帶漕河一年之間各工次第報完
支流疏於上而黃河之勢以分長隄障於下而黃河之
沙不入沛漕挑通糧運徑過兩經大水不復淤塞此雖
資官府之財藉人夫之力以有成亦由各官盡心分理
竭力趨事之所致也如調任虞衡司郎中丁洪處事周

詳為人耿介都水司主事李邦直設施有序才行俱優
調任霸州兵備副使陳文沛剛敏有為操持克慎河南
管河副使周忠蒞政精勤飭躬端謹皆分董大工共致
成效者又如兗州府同知李仁陳約通判張儒大名府
通判郭從道開封府同知閻祺潘國臣任府佐而各稱
厥職如濟寧州判官楊時中徐州判官溫文標項情邳
州判官楊政單縣主簿郭景輝貳州縣而各有所長皆
分管工程效勞脩濬者也乞勅吏工二部查議如果臣

言不謬將前項各官甄錄量為陞擢則賢勞有勸矣緣
係旌舉賢勞官員及奉欽依事理未敢擅便為此具本
順差承差張譽親齎謹題請旨

多病乞休薦賢自代疏

奏為多病乞休薦賢自代事臣自去年七月奉命治河
夙夜兢惕勞心宣力今年六月以來半身頭面麻木手
足痿痛服藥灸火醫治罔效於時以河功未上不敢自
陳勉強力疾狼狽至今加以腸風舉發失血日甚勢不

得不自陳也竊思往年沛漕沙淤旋挑旋塞以黃河一
溢則一淤也今既請濬孫家渡加撈趙皮寨以分其勢
起築長隄于單豐沛三縣以防其溢挑濬沛漕通利糧
運兩經大水不復淤塞又請勅除用兵脩副使兼管豐
沛徐淮黃河則河南山東直隸一帶皆有憲臣管黃河
矣又議處孫家渡趙皮寨撈淺官夫則支河可常通矣
又議處單豐沛三縣守隄官夫則長隄可永固矣運河
又有郎中主事等官如常管理矣使臣不患疾病不知

止足亦不過坐靡廩祿無他猷為此臣今日所以得自
陳也臣又思大臣有以人事君之議雖得謝不忘為國
之誠查得先年督理河道嘗以都御史通政等官令訪
得河南右布政使陶諧忠鯁著名老成行事副使周忠
蒞政精勤飭躬端謹霸州兵脩副使陳文沛剛敏有為
操持克慎且皆嘗任管河號稱諳練者也伏望聖慈賜
臣休致以便調理仍勅吏工二部議請將陶諧等量陞
一員代臣其過臣必遠矣緣係多病乞休薦賢自代事

理未敢擅便為此具本順差承差郭喬親齎謹具奏聞
伏候勅旨

薦舉河道方面官員疏

題為薦舉河道方面官員事臣奉命治河一應河道事
務督同各該三司掌印及管河守巡等官從宜議處賴
以集事中間賢能官員臣不敢蔽除河南右布政使陶
諧管河副使周忠霸州兵備副使陳文沛素諳河事臣
具薦自代外訪得山東右布政使邵錫歷官秉忠直之

節敷政得承宣之體按察使顧應祥風裁表乎僚屬歷
練優于政務左參政邊憲文學足以飭政端厚慎於行
已張宏氣剛正而不撓事敏達而無滯天津兵脩副使
姚文清司憲而肅紀綱詰兵而清河路僉事沈圻執法
出自內臺秉公施於有政河南右參政伍全勤慎協于
官箴老成堪總藩政副使樊繼祖署總司而憲度明正
一已而屬吏服僉事祁鶴勤巡歷而政舉崇儉素而守
嚴王洙能其風憲之官勵于清脩之行以上各官皆河

道有干賢能堪薦者也乞勅吏部查訪如果臣言不謬將各官甄錄量為陞擢則賢能有勸矣緣係薦舉河道方面官員事理未敢擅便為此具本專差承差郭喬親齋謹題請旨

薦舉河道郡縣官員疏

題為薦舉河道郡縣官員事臣奉命治河一應河道事務督行山東河南直隸各該府州縣官從宜區處賴以集事中間賢能官員臣不敢蔽除管工同知等官李仁

等另具旌舉外訪得兗州府知府劉夢詩愷悌得民牧
之體明敏堪繁劇之任東昌府知府王杲用財省而宜
于民守已嚴而達于政開封府知府劉漳政平易而近
民性明達而有守淮安府知府葛木刑清而政兼舉守
慎而民相安揚州府知府陶儼居官不携家累恤民尤
重夫差大名府知府樂鵠歷練而政疏通公平而民懷
服皆作郡之賢能者也滋陽縣知縣谷鸞寬嚴之政適
宜勤慎之行不苟山陽縣知縣姜潤身秉清節而民甚

宜更劇邑而才始展江都縣知縣劉良卿器偉而操履
端才長而廢墜舉長垣縣知縣王懋風紀素著賢聲遷
調益諳政體沛縣知縣平世祥理疲弊之邑得張弛之
宜豐縣知縣高祿撫墊溺之民脩平易之政皆作縣之
賢能者也以上各官俱堪薦舉乞勅吏部查訪如果臣
言不謬將各官甄錄量為陞擢則賢能有勸矣緣係薦
舉河道郡縣官員事理未敢擅便為此具本順差承差
郭喬親齎謹題請旨

謝恩疏

奏為謝恩事嘉靖九年六月初三日准吏部咨為及時
疏河以防水患事內開該本部具題嘉靖九年五月二
十一日奉聖旨潘希曾准加尚書俸級着照舊用心總
理河道欽此臣欽遵望闕叩頭外伏念河流自昔靡常
運道於今為重稟綸音以從事職分當然賴國福而幸
成胼胝奚有乃蒙天恩罔極日照不遺采吏工兩部之
言錫俸級二品之盛福逾涯分惟深覆餗之虞報乏涓

埃徒切傾葵之悵臣不勝感戴天恩之至為此具本專
差承差張譽親齎謝恩謹具奏聞

河道疏

題為河道事據管河郎中黃行可呈蒙欽差總理河道
事務工部右侍郎兼都察院左僉都御史潘批據直隸
淮安府申前事批仰本職作速勘處通行回報備行淮
安府轉行本府並淮大二衛掌印管河官員會同勘議
停當呈來覆勘去後續據該府經歷司呈承准本府照

會准通判李重牒稱會同本府掌印知府葛木并淮大
二衛掌印管河指揮蔣繼爵等親詣信字方家二壩議
勘得新莊閘口緣在淮河上流故其水勢常高裏河數
尺清江浦月河緣下新莊口二十餘里故水視彼已低
二尺方家信字二壩又下月河二十餘里故水視月河
又低二尺若於其旁開口置閘則裏水可以順出後或
淮水涸落之甚而懼裏水走洩則閉閘而開月河又甚
則閉月河而開新莊閘若或外河漲盛則三口俱閉而

暫車壩隨宜開閉底工力不致太費而運道可以無虞
柰建閘地基在信字壩尚有不便蓋必由通津橋而東
行二百餘步轉折而北又須拆民居房室數家方可建
置其方家壩則壩西觀音堂前已有空便基地且觀音
堂係尼僧創建應合拆毀先作石閘一座仍將裏口新
建板橋再加椿木築打中畱閘門立木枋挨牌啓閉節
水可以祛水患通運道除已脩完方家信字二壩省令
一應船隻俱由車盤外等因牒府備呈本職又經親詣

閱視得清江浦月河與方家信字二壩地形水勢委漸
低下除信字壩工費浩大難並建閘外合先於方家壩
旁次及原議清江浦月河口各建石閘一座裏水可以
順出酌量淮水消長隨宜開閉車盤若水落之甚仍開
新莊故道經行糧運庶免妨阻之患實經久可圖之計
也其通判李重欲以石閘之裏又造木閘似為重併無
益又經公同知府葛木等覆議相同等因具呈到臣據
此會同總督漕運兼巡撫鳳陽等處地方都察院右副

都御史劉節議照淮黃合流自西而東初經新莊閘又東二十餘里經清江浦月河又東二十餘里經方家壩水勢趨東愈下故岸形迤東漸高每年夏秋河漲須閉新莊閘以防沙水內灌船由月河往來漲甚又須閉月河口以防沙水內灌惟方家壩岸形稍高可以開口行船且洩裏水之溢故郎中黃行可知府葛木等議要先於方家壩旁次及原議清江浦月河口各建石閘一座與新莊閘座隨宜開閉若或河漲大甚則三閘俱閉船

由信方等壩車盤蓋因時救患通漕之計也及照該府
原申內開各屬淺夫原額雖有一千二百名除逃亡事
故外實在工僅有一千餘名且各處築濬恐不敷用合
仍顧覓人夫三百名相兼淺夫匠作併力掘砌其作閘
物料聽管河郎中查取貯有河道錢糧去處動支買辦
夫匠工食合量動漕運無礙官銀查照舊規日給銀三
分淺夫亦宜日給米二升或銀一分計其勞費亦不甚
多伏望皇上軫念地方水患及漕運急務特勅工部計

議合無俯從所請於前項地方開設石閘二座合用人夫錢糧臣會同都御史劉節從宜區處府衛管工委官俱屬管河郎中黃行可提調督理事完造冊奏繳庶運道有備而水患亦稍除矣緣係河道事理未敢擅便為此具本專差承差王鼎親齎謹題請旨

黃河復由故道疏

題為黃河復由故道事嘉靖九年十月初八日據河南管河副使周忠呈查勘得虞城縣原有小股河本年六

月以來自上源衝開由歸德州丁家道口直至本縣地方橫流往夏邑并直隸碭山縣去訖本月二十四日據兗州府單縣管河主簿郭景輝呈勘得黃河至曹縣地方胡村寺東衝開一道濶三里有餘東南至本縣賈家壩入古蹟黃河由歸德州丁家道口至徐州小浮橋入運河胡村寺東北衝開一道濶一里有餘又分為二支東南一支經虞城縣至碭山縣合古蹟黃河出徐州東北一支經單縣長隄盡頭至魚臺縣漫為坡水傍谷亭

入運河其單豐沛三縣黃河賴長隄障迴即今沙淤平
滿民多耕作不復為沛漕之患等因各到臣卷查節據
兗州府管河同知陳約呈本年六月初二日黃河溢出
河岸流至單縣長隄脚下深五六尺瀰漫東流徐州碭
山縣申本年六月二十四日黃河泛漲自上源虞城單
縣二處衝流入境開封府歸德州申本年六月二十六
日黃河水大漲將上源梁靖口等處衝開漫入虞城縣
境內已經臣督令各該管河官於河患處所加謹脩防

候汎濫稍退流派可辨仍將河道變遷緣由勘報去後
今據呈報前來查得黃河由歸德州至徐州入漕河者
故道也永樂年間濬開封支河達魚臺縣入漕河者以
濟淺也自弘治年來黃河改由單豐出沛之飛雲橋而
歸德故道始塞魚臺支河亦塞然以其出於沛橋亦可
資以濟淺以其逼近沛漕又恒有衝決沙淤之患朝廷
連年脩濬勞頓甫息一旦全河復其故道則患害已遠
支流達於魚臺則淺涸無虞矣雖河性靡常不可逆觀

由今觀之實漕運之利而國家之福也緣係黃河復由故道事理為此具本專差承差王鼎親齎謹具題知

薦舉河道方面官員疏

題為薦舉河道方面官員事查得山東布按二司右布政使等官邊憲等河南布按二司右參政等官伍全等先嘗經臣薦舉者不復枚舉外訪得山東左布政使李緋承宣優大藩之任精練敏庶政之脩右參議何璦敷政宜於地方持身得於勤慎曹濮兵備副使嚴時泰飭

武備而河防脩贍文詞而操守慎徐州兵備副使何鰲
執法而污吏有懲詰兵而河務兼舉僉事史臣巡歷勤
而所守嚴刑獄慎而法事習河南按察使今陞右布政
使林大輅總憲司而綱紀克嚴布藩政而蕃宣允稱以
上各官或掌印或守巡或兼管河皆有裨河道賢能堪
薦者也乞勅吏部查訪如果臣言不謬將各官甄錄量
為陞擢則賢能有勸矣緣係薦舉河道方面官員事理
未敢擅便為此具本順差典吏高志仁親齎謹題請旨

薦舉河道有司官員疏

題為薦舉河道有司官員事查得山東兗州府知府劉夢詩直隸淮安府知府葛木大名府知府樂護河南開封府同知潘國臣山東兗州府同知李仁等先嘗經臣薦舉外訪得直隸河間府知府徐景嵩公忠秉給諫之舊政理有循良之風滄州知州吳成禮性淳而守不失才敏而政益脩揚州府同知郝守正為人員宏深之器署印彰練達之才通判白鑑行已廉而輿論歸供事勤

而厥職舉高郵州知州曹曙才優而薦更劇州行謹而復諳河事淮安府通判李重佐郡素長幹理督工尤效勤勞山東東平州知州胡松年妙而學識優政勤而操持慎以上各官或掌印或管河皆賢能堪薦者也乞勅吏部查訪如果臣言不謬將各官甄錄量為陞擢則賢能有勸矣緣係薦舉河道有司官員事理未敢擅便為此具本順差典吏高志仁親齎謹題請旨

自陳乞罷以彌天變疏

奏為自陳乞罷以彌天變事近日午門西樓雷震垂眷
皇上過自貶抑諭羣臣同加脩省蓋克謹天戒以奉迓
天休即古帝王澤水自儆大旱自責之心也顧臣僚託
體股肱不能為陛下代天之工而致天之譴罪復奚逃
臣才識素劣衰病交侵叨貳本兵曾無寸補固宜罷黜
者也伏乞聖恩賜臣退休簡賢能以充任使庶幾天工
不曠而天意可回矣緣係自陳乞罷以彌天變事理為
此具本親齋謹具奏聞伏候勅旨

計處大政以圖治安疏

題為計處大政以圖治安事職方清吏司案呈本部送吏科抄出廣東道監察御史郭希愈

云

奉聖旨該部

看了來說欽此欽遵抄出送司案呈到部看得廣東道監察御史郭希愈題稱推陞兵部左右侍郎要於素在邊方曾經督兵及才識膽畧謀猷為衆所推服者註實請用內分一員專一講求邊方軍務一員專一講求腹裏軍務又各自選有智計屬官一二員為之贊畫遇有

警報各照地方即與尚書言之以調度若聲勢重大亦各照地方即與贊畫屬官前去提督以決勝等因除准吏部咨稱議推兵部侍郎一節本部查覆外查得諸司職掌兵部尚書侍郎之職掌天下武官選授及天下地圖城隍鎮戍烽堠與夫傳驛廐牧戎器等政則凡邊腹軍務皆侍郎職分之所當理與尚書共濟者也似難分限以致乖隔其屬有四曰武選職方車駕武庫則凡邊腹軍務乃各該郎中員外郎主事分任而習理者也似

難又專委一二人贊畫及照我國家百六十年來如遣將總兵率以公侯伯都督等官遣文臣總制或提督率以尚書侍郎都御史等官然皆臨時命文武多官會推堪任大臣二三員上請簡用事平則將歸於班行兵散於營衛故將無久擅之權兵無不戢之患茲欲以兩侍郎分領邊腹軍務似未悉我祖宗臨事遣將之深意况預定左右侍郎將兵之任則各處撫鎮等官皆將觀望諉避不免誤事或所擬侍郎一有事故該地方用兵又

將誰屬豈諸大臣中遂無一人可屬此亦似非通論臣等俱不敢擅擬其本官所陳武備事宜則皆切於時務合候命下移咨總制提督巡撫等官申明脩飭仍將某邊與某邊相隣某省要害與某省相接地里相距若干彼此可否策應山川形勢之險夷鎮戍城堡之脩廢軍民兵馬之精壯衰耗糧料有無足給器械有無堅利地方有無應合增脩事務及戰守機宜將領賢否等項各開款備造小冊一本及畫圖貼說付公差人役附齎繳

部以憑參考施行惟復別有定奪均乞聖裁緣係計處大政以圖治安及奉欽依該部看了來說事理未敢擅便謹題請旨

比例乞恩請給書籍疏

奏為比例乞恩請給書籍事臣聞之禮曰天子聽外治后聽內職外內和順國家理治此之謂盛德三代而下此道微矣恭惟皇上德隆神聖治務本原以大學衍義實治國之規三后傳訓實理家之要乃命工翻刻序之

宸翰而以衍義進講於經筵傳訓示法於宮壺隨復頒
賜臣工傳播遐邇此誠欲內外各正其位臣民咸式其
言以成中興和順之治而上比於三代之隆甚盛舉也
臣彼時以工部右侍郎奉命總理河道在外未預頒賜
之列聞茲曠典實切欣慕久欲上請懼瀆聖聰查得近
該御史李美等奏請前書已蒙准給臣輒敢冒昧以聞
伏望皇上一體頒給俾臣得日夕覽誦近以為脩身之
模而什襲珍藏遠以為傳家之寶感荷恩私世世無極

矣臣不勝願望之至緣係比例乞恩請給書籍事理為
此具本親齋謹具奏聞伏候勅旨



竹澗集奏議卷四

欽定四庫全書

集部

竹澗集附錄

詳校官中書

臣孫

溶

中書臣劉源溥覆勘

總校官知縣臣楊懋珩

校對官中書臣李荃

謄錄監生臣唐燦

欽定四庫全書

竹澗集附錄

明故正議大夫資治尹兵部左侍郎贈兵部尚書

竹澗潘公墓誌銘

於乎竹澗而遽而化耶化者之寂滅孰樂耶生者之哀孰妄耶抑理固有常而非常而謂樂與哀皆妄耶未可知也於乎昔在壬癸之歲偕公奉節誥封于安南歷齊魯徐揚之墟亂于江淮達于吳越惟予與公偕惟時公

則先趨而歸予獨登越王臺觀會稽窺禹穴訪陽明之
洞然後返錢塘過嚴瀨以會公於金華撫赤松觀皇初
平化羊石然後浩然偕南汴潯橫之江以出憑祥兩涯
之山夾江挿天竒恠百出目眩心悸笑歌相答忘乎其
為行旅矣凡相與歲月之間無有幾微相逆于心者然
後知公之為盛德人也反還朝無何予以憂去繼以病
不起離索者八九年及今上改元予奉召至京見公無
幾而予為祭酒以南及予方北公亦治水還朝歷歲夏

官卿未及三年而公一日勿病而化於乎人生離合無
常死生亦無常予安得不動今昔之悲乎其子徽以其
子壻文德之狀來請誌銘予攬涕勉為誌而銘之誌曰
竹澗公潘其姓希曾其名仲魯其字竹澗其號金華其
里彥亨其高祖文華其曾祖洪其祖璋其考彥亨應洪
武賢良聘使江右有專對之才未官而卒文華以洪貴
贈山東道御史洪以御史累官廣西按察僉事又以璋
貴贈奉政大夫璋由水部郎司權荆湘有聲為僉事督

學於蜀有聲官至陝西副使督學卒食俎豆于蜀之名
臣發之鄉賢祠後洪璋俱以公貴贈中大夫南京太僕
寺卿祖妣吳氏封孺人母姜氏封安人俱累贈淑人其
世德之積累也公生七年能詩文十有四年喪憲副公
於陝奉淑人以喪歸塋讀禮如成人弱冠補郡弟子員
經學迥異督學者必器重焉弘治辛酉舉鄉試壬戌登
進士皆居上第選翰林院庶吉士秋迎母淑人以疾終
則扶柩還塋如喪憲副公服除授兵科給事中武廟登

極恩詔贈憲副公中憲大夫母恭人茲其出身之履歷也天性孝友簡默惇愨接人和夷未嘗作諧謔語有德於人未嘗自言人有不禮未嘗見其非口不言人過有言人之短者則為默然又不樂趨時進取居三品者且三考至滯也人問之則笑此其德性也沉默不露外視之若愚及臨大事決大疑若庖丁之理牛無不迎刃而解者茲其材能也正德丙寅有汪鉦者故太監汪直義男也乞陞錦衣衛鎮撫帶俸守塋公即首疏以為世祿

以及子孫鬼神不歆非類內臣本無後而強求世祿之恩義男本異姓而欲冒他鬼之蔭疏上中官皆切齒側目又上疏勸上隆大孝勤聖學節遊樂遠佞倖八事逆瑾遂謀中傷之以發前憤乃差公湖貴二省計處邊儲至則有司為備千金以請曰今瑾虐焰日熾凡差者以賂免時也勢也公毅然卻之曰我諫官也未能為朝廷除惡柰何復爾乎瑾因大怒矯詔下獄拷訊欲寘之死杖于闕下暈不知人矣瑾快曰死矣左右負以出不知

公之復甦也然且除為民歸則杜門深居宅旁有水水
際有竹蔭可息間招親友觴咏悠然自得因自號竹澗
居士庚午瑾伏誅明年詔復其官刑科右給事中壬申
奉詔持節往使安南賜一品服以行尋由吏科右給事
中陞禮科左入其國遠近皆來瞻仰其儀度以為從天
而下莫不起敬且為中國重非徒不辱命而已途中述
作有南封錄反命陞工科都給事中時內官監奏請脩
太素殿天鵝房諸役費累鉅萬公抗疏力爭之曰方今

邊儲告匱冗食日繁山東河南近經兵燹江西四川瘡
痕未起况營建清寧二宮大木採及於遠方工料派遍
於天下若復別興土木誠恐民不堪命疏上不報丙子
遷南京太僕寺少卿奏易買馬為折色寬滁和之民困
而馬課視昔尤易完遇災沴則請蠲貸以蘇之長淮南
北之人咸德焉今上御極遷本寺卿復遇恩詔是以有
祖考之贈癸未遷南京太常寺卿期月改提督四夷館
乙酉晉都察院右副都御史督南贛汀漳等處軍務先

是招撫新民或多以詐殺之是以往復猖獗為民害
公鑒其弊務馭以誠信惟於自相告訐者亦聽之而其
黨以離有功未賞者悉令賞之以示恩信惠州黠寇賴
貴聚衆肆虐則進兵剿之空其巢凱奏賜金幣慰勞泐
頭餘賊曾蛇仔七巢並興流毒江廣則發諸路兵夾攻
之賊計窮襲通判董鳴鳳以要我撫公曰不可墮其計
中耳乃佯曰通判自債事不足恤督兵益力戰數合賊
大敗生擒渠魁餘黨奔竄通判卒獲全遂犁其庭籍其

田以業貧民廉其脅從者分配內地上功多歸之人弗
以自伐曰臣子效勞常事耳俘獲涉疑似者不以報奏
上會召入為工部侍郎故論功竟弗及人益高之及還
朝時黃河溢淤漕渠任事者方興新河之役費且數十
萬死者數千人人心洶洶欲為亂歲運不繼廷議必得
公往代乃可賜璽書兼憲職以往莅事公還甫三月也
於是誓殫慮畢力以濟大事夙夜思惟廉知沛漕之淤
塞因黃河之旁衝黃河之旁衝因上流之未疏今宜疏

支河以殺其勢築長隄以防其衝然後鑿通沛漕自無復淤之患乃上疏謂河流故道非一其大而要者若孫家渡趙皮寨乃上流之支河也沛縣飛雲橋乃下流之支河也弘治以前三支分流會于淮而入海故徐沛不受其害邇來上流二支俱就湮塞全河東下併歸飛雲橋一支下東徐呂二洪上遏開河流水溢為游波茫無畔岸於是決隄壅沙大為漕患人以為探本之論既至濟即達觀徐沛險阻而得其利害乃復上疏以為濟沛

間漕渠忽淤者蓋由決河西流橫衝并掣開河之水東入昭陽湖故閘水不復南流而飛雲橋之水時復北漫故沙停而淤也今宜加築東隄以遏入湖之路更築西隄以防黃河之衝臣愚不敢求新奇之功不敢為苟且之計惟欲因舊以為功從省以濟事故捨新河而脩舊漕者圖其易也沿黃河為隄百四十里者防其溢也停築派夫十數萬僅用河夫二萬餘者恐民勞也罷雇募而行犒助者慮繼費也上並嘉納之不期年而功成以

公有定策也已丑秋河溢境山西徙三百步亂石絕流
流下射高數仞雖虛舟不得上有冒險而下者十覆三
四公乃命穿故河廣十步以通水稍截徙河逼之東仍
於徙河兩崖下埽以漸相屬埽漸逼河流激盪因決入
故河奔放衝滌一夕河廣一倍二三日盡復其舊人曰
今人未見禹之行水未知於公何如耳後之初興也有
風公終新河之緒者有風公條新河之害以聞者公一
弗從蓋公之忠不欲殉人之非以償國之是而其厚不

欲揚人之短以彰已之功故功卒成而人弗病於是傅御史烱章尚書拯各疏公費省而成速畫一而有序坐收累年難就之功宜加陞賞詔陞尚書俸級總理如故然而公自此嬰疾矣蓋由鞠躬盡瘁有所不顧焉耳己丑冬上疏乞骸溫旨慰留辛卯春召改兵部右侍郎五日而部署災時堂屬多被逮上察公任淺特貸之公益感奮以一身當衆務之劇收拾圖籍於散毀之餘釐革宿弊而復之舊章則其事業也是年秋遷左尋奉勅督

理仁壽宮工役力疾趨事壬辰三月十九日上御正殿
傳制賜進士公朝服侍班退朝同省迎進士合主賓百
餘人冠蓋濟濟宴會盡歡比日昃始歸又延接賓客罷
則如卧內少休有頃則氣微微逝矣明日訃聞於朝朝
紳皆驚愕以為神異天子贈公兵部尚書賜祭塋所著
有竹澗集若干卷又嘗作潘氏家乘以聯屬族人公生
成化丙申三月十三日距卒享年五十有七娶葉氏累
封淑人前壬辰進士知和州梅澗公睦第三女性慈孝

事姑姜淑人得其歡心又能逮下男子三人女子一人
長男徽登己丑進士任南京刑部主事女粹適程內翰
文德俱淑人出庶子紹邑庠生章氏出綬葛氏出孫男
四人長承祜以公蔭為太學生次承祥承禴俱徽子承
禔紹子孫女三人公卒三十有三日徽來奔自南都扶
櫬而歸將以是年十二月壬寅塋於武義縣來蘇鄉牛
山之原銘曰嗟公行已如公行水然順而因應莫為之
先大服于子焉朝而朝天日中遊宴以周旋晷刻不息

而化吁其僊賜進士出身通議大夫禮部左侍郎前國
子祭酒翰林侍讀兼脩國史經筵講官增城湛若水撰
大司馬竹澗潘公傳

公諱希曾字仲魯浙之金華人也其先畢公高子季孫
者食采于潘子孫因以為氏宋南渡初潘為著姓待制
默成先生以清節歷事三朝為世偉人里閭稱為清潘
又節度使鄭王之後尚主隨駕南渡貴傾一時居城西
偏人稱為貴潘其自括之竹溪來者田宅甲一郡至景

憲父子始以科第顯人稱為富潘三潘鼎居更元之亂
世微譜散公族籍以儒稱而竟莫辨其誰裔也入國朝
洪武間有彥亨者以賢良徵至朝堂問治道仍奉使江
右未拜官卒彥亨生文華贈文林郎山東道監察御史
文華生洪為御史論列無所避陞廣西按察司僉事累
贈中大夫南京太僕寺卿洪生璋即公父也登成化壬
辰進士歷官陝西按察司提學副使累贈如僉事君嘗
為水部司權荆湘有令譽為僉事督學於蜀推其所自

得者為教士風文體翕然丕變蜀人士仰之若山斗樂之如父兄於是宿州知州萬本奏稱天下提學得人若陳選戴珊潘璋數人云云連擢關中教士如蜀不踰年而卒時諸生以大比集省下咸奔走致奠如喪所親蜀士聞訃亦相率會奠三公祠下哭之盡哀後數十年蜀士夫來浙皆往吊于墓蜀名宦嫠鄉賢皆俎豆焉祖母吳氏母姜氏俱有賢行累贈淑人公兄弟三人長希壘散官次希顏汝王教授公最少穎異七年能詩文十有

四年喪憲副公于陝奉淑人以喪歸讀禮如成人弱冠
補郡弟子員慨然慕鄉先哲何王金許四君子之傳砥
行明經迺出流輩董學諸公咸器重焉試輒首選弘治
辛酉舉于鄉明年壬戌登進士皆居上第尋被選翰林
庶吉士秋迎淑人就養京邸未幾淑人以疾終公扶柩
還塋除服授兵科給事中時閹豎初熾公灼見其幾有
汪鈺者故太監汪直義男也乞陞錦衣衛鎮撫帶俸守
塋公即疏奪之其畧曰臣聞名不正則言不順理既屈

則辭必窮彼稱汪直微勞以欺陛下獨不思憲廟用舍
與衆為公向革汪鈺之職豈無見而負人功乎又稱孤
墳可憫以欺陛下獨不思先帝賓天言猶在耳顧恐改
於其道乎況世祿以及子孫鬼神不歆非類內臣本無
後而強求世祿之恩義男本異姓而欲冒他鬼之蔭物
理人情甚是無謂疏上中官切齒而公之禍基矣復因
災異陳言勸上隆大孝勤聖學節遊樂遠佞倖振因循
懲玩法備邊事勵士節八事其畧曰事天之道不外於

事親得親之心斯可以得天伏望陛下勤詣靈几躬禮宗廟近思先帝教育之恩遠念祖宗累積之德又時朝于兩宮曲盡母子之情樂聞訓誥之益乃所以隆大孝也至於講學一事尤帝皇圖治之本從容便殿之中講論片時之會與視朝御膳等爾於聖體未勞也顧乃專事游樂不避炎日陛下柰何舍有益而不為作無益而不憚勞耶伏望仍開經筵日講使日新之功有加無已乃所以勤聖學也如射獵遊戲往往使人心意荒惑形

神勞頓千金之子坐不垂堂陛下以宗廟社稷之身豈不自愛哉此皆由左右前後不得正人希寵導非迷君誤國伏望放鷹犬絕玩戲仍簡內臣端謹者以充侍從務俾游樂有節而佞倖不得近天下之患莫甚於因循因循不振則國政日弊近該部奏准查革冗食濫費足國裕民莫急於此而乃累旬浹月不即奉行部寺猶然諸司何責京師如此藩郡可知伏乞降旨切責斷在必行庶幾人心知警而因循可振也朝廷之患莫大於玩

法玩法不懲則主權下移近該部奏准查看草場以補
國用太監寧瑾乃敢無故奏沮此其徇私罔上情罪顯
然乞特敕法司究治庶幾威權不失而玩法可懲也方
今北敵窺視南夷竊發蘇松近地海寇嘯聚江西四川
時各有警夫用力攻戰固在將官而運籌調度多在憲
職往時巡撫起自陞用者率與邊境及其頗積年勞漸
轉內地此但為人擇官非為地方任人也今宜察其不
堪邊寄者取回別用果有文武長才者特加久任秩滿

則加其官有功則錄其嗣債事則治其罪如此而敵寇
不靖臣弗信也臣又聞國家必養廉恥之士而後能得
忠義之臣律例文武官犯公罪並許收贖守御上直軍
校犯笞杖罪俱令納鈔婦人應決杖者非姦罪不去衣
此我祖宗仁至義盡也且廷臣密邇不啻軍校賢者守
身不異貞女小有過犯多受刑辱臣竊傷之乞敕法司
鎮撫凡常朝官員過犯非係贓惡無得去衣加辱庶幾
全君臣之大體興禮教於無窮其於國家非小補也他

疏語皆凱切不便近倖由是逆瑾遂謀中傷正德丁卯
差湖貴二省計處邊儲陞吏科右給事中時瑾虐焰方
熾凡差者必重賂蘄免禍有司亦為公備千金公毅然
却之曰我為諫官不能為朝廷除惡我之罪也柰何復
助之乎瑾又風公多參劾為賄地公復不從瑾大怒矯
命械公下詔獄考訊欲寘之死既復杖于闕下奄然而
暈瑾快曰死矣左右負以出久乃甦當時見瑾者雖公
卿必屈即被謫遣亦必辭以行公既除籍為民獨不往

還鄉里杜門不出日惟課子弟讀書宅後池旁佳竹蔭
可息間招親友觴咏悠然自得因自號竹澗居士時蘭
谿章楓山先生慙於人少許可獨稱公清脩苦節且貽
書曰世上何人號最閒司諫拂衣歸華山執事此歸
賢於二十四考中書矣庚午瑾伏誅明年詔起公刑科
右給事中壬申偕編脩湛公若水奉使安南錫麟袍玉
帶服以行尋陞禮科左給事中入其國先諭威德正禮
儀然後致命返三辭其臚皆作詩諭意足以服裔夷章

王靈非徒不辱而已紀事觀風有南封錄馬反命陞工
科都給事中時方營建乾清坤寧二宮內官監復請脩
蓋太素殿天鵞房船塢諸役費累鉅萬公抗疏爭之其
畧曰天下之財力有限二宮之營建方興寬一分則得
一分之濟早一日則享一日之安況邊陲之軍儲告匱
內外之冗食益繁山東河南近經兵燹江西四川未復
瘡痍大木採及於遠方工料派遍於天下若復別興土
木誠恐民不堪命且古昔帝王非無臺池以供遊觀然

其作有時其遊有節故民樂其樂天眷其德考之月令
當夏母起土功母發大衆今時既不宜矣况大內遊玩
之處頻年營建不少必欲繼作尤非撙節之道疏上不
報丙子遷南京太僕寺少卿先是滁和之民困於納馬
公為奏更折色民大稱便而馬課視昔易完每遇災沴
復請蠲貸長淮南北之人咸德焉丁丑環滁大雪時聞
鑾輿北幸乃作感雪賦其辭曰弭余節于滁陽兮歲聿
暮不吾與曰彊圉赤奮若兮維律中乎大呂顓頊嚴令

兮使玄冥驅其先風伯憤噫兮雲師乘以垂天羌感發
兮逾栗烈夜浙瀝而霰先集兮晝忽繽紛而雨雪駕玉
虬兮騁白螭騰踏銀漢兮濺冰屑夫何累旬月止復作
兮紛委積而交加折脩竹以失聲兮封枯楊而生花歸
官寺兮山之麓接曠景兮平臯阻寒氣兮空谷旦余適
野之莽蒼兮雪始霽而日煜千門凍而反閉兮萬竈淒
其未烟燦瓊枝兮林立瑩氷柱兮簷懸僵狐兔以屏跡
兮饑鷹隼而莫騫見六合以昭回兮斂萬籟而寂然吾

方遊乎塵垢之外兮幸昭質之未窳步余馬於白水兮
按余轡於瑤圃飲沆瀣兮飧玉英懷琬琰兮佩琳琅苟
余心之皎潔兮雖遠引其何傷嗟滌之僻兮樂有餘逝
彼北喬兮僻不可居層氷峨峨兮陰山萃矧豺狼飢飢
兮虎豹出沒美人之遊兮輒不及攀良辰感我兮怛肺
肝亂曰寒既沍兮歲亦殫幽獨處兮誰與歡宣余力兮
及時難望朔雲兮天漫漫鳳有岡兮龍有淵思美人兮
不敢言在滌六年不調今上御極擢本寺卿嘉靖癸未

遷南京太常寺卿期月改北提督四夷館時大禮未定
議者紛紛公慮其聚訟而貽患也作大禮問以解之其
畧曰或問禮官之說皇上以小宗後大宗特重大宗降
其小宗亦既合禮經矣曷為議者未已也曰此宗子法
也非所以定天子之大禮也其說何也曰宗法為公子
卿大夫設也君不與族人為宗也為人後為繼大宗設
也君無為人後之禮也且古之後大宗者必屬乎子道
者也故可以為父子仲嬰齊以弟後兄非禮也而公羊

高曰為人後者為之子附會之過也魯僖公以兄繼弟
非世及之常也而胡安國曰臣子一例以僖嘗為臣夫
謂臣猶子也則可謂為之子惡乎可近世人主禍其所
後則何如曰屬乎子道嘗受命為後擬諸宗法庶乎其
可也非此類也何可比而同宗法耶然則其稱號柰何
曰天叙有典人不可汨也其廟次柰何曰生為之臣死
不得儕於君也其昭穆柰何曰父昭子穆未之有改也
或世次不相當不以親親害尊尊可也仰惟我皇上即

位承武宗遺詔遵祖訓兄終弟及之文揆之春秋之義
克正其始矣其繼武宗之統以主宗廟之祀非若宗法
必為之後而後得奉其祀者故以倫則武宗兄也孝宗
伯考也以位則皆君也皇上以弟代兄以臣道事先君
其為繼武宗也名正而言順矣武宗而有繼也則孝宗
固未嘗絕也何得舍武宗而不繼何必考孝宗而後為
繼耶由此言之興獻帝聖考也興國太后聖母也名正
而言順矣若夫尊崇之典則亦有可言者宋英宗既後

仁宗程頤尚謂其父濮王當別立殊稱矧我皇上聖父
母乎如曰子無爵父之義周不有追王之禮乎廟祀之
典則又有可言者天子為百神之主尚當祭其國之無
主後者而顧不得祭其父乎別建寢廟不敢干宗廟之
紀不亦可乎公言出而羣議遂定時議禮當上意輒得
不次擢公嫌希附卒不以聞主議者求觀亦弗予上計
已決期日下詔上寶冊宰臣猶執舊議上甚怒禍且不
測公往與言遂草詔大禮卒以定而臣工陰受其福公

有調和之力馬乙酉晉都察院右副都御史提督南贛
汀漳等處軍務賜璽書斧鉞至則明號令脩器械時簡
教廉謀勇信賞罰先是壬癸之亂招撫新民或詐殺之
由是各巢往往復連比為患公鑒斯弊務馭以誠信惟
自相告訐者聽之以離其黨舊有功未賞者有司或吝
出納公謂此何以勸且示之不信悉賞之於是惠州黠
寇賴貴聚眾肆虐公發兵洗其巢穴凱奏上嘉悅賜金
幣慰勞泐頭餘黨曾蛇仔等七巢並興大肆毒痛遠近

震恐公發諸路兵夾剿賊大懼願撫且襲通判董鳴鳳
以要公曰此賊故智耳昔人常墮其計容復蹈乎乃下
令曰通判自債事不足恤有能掖之出者予弗死益督
進兵力戰賊大敗渠魁生禽俘馘千餘牛馬器械獲甚
衆餘黨奔竄於是犁其庭籍其田業貧民審其脅從者
分配內地通判卒獲全公制變決機竒中折衝尊俎之
間而親臨戰陳者咸弗及也至上功獻捷初弗張皇謂
臣子效勞期於成事而已希賞非我志也故紀述勞勩

多歸之人其俘獲稍涉疑似即不以報會掾吏白故事
宜納賂不者功雖高不賞公曰我寧無功耳奏上會召
為工部右侍郎迨論功竟弗及焉還朝值河溢淤漕任
事者方興新河之役費且數十萬死者數千人人心洶
洶歲運不繼上憂之廷議必得公代乃可賜璽書兼憲
職往泣事公還甫三月也既受命誓殫慮畢力以濟大
事夙夜思惟考故詢謀以沛漕之淤塞因黃河之旁衝
黃河之旁衝因上流之未疏今宜疏支河以殺其勢築

長隄以防其衝然後挑通汴漕自無復淤之患乃上疏
其畧曰河流故道非一其大而要者若孫家渡趙皮寨
乃上流之支河沛縣飛雲橋乃下流之支河弘治以前
三支分流會于淮而入海故徐沛不受其害邇來上流
二支俱就湮塞全河東下併歸飛雲橋一支下東徐呂
二洪上遏開河流水溢為游波茫無畔岸於是決隄壅
沙大為漕患今日之計固當挑濬舊漕以通糧運加築
隄岸以防衝決然非疏上流之支河將來秋水復發沙

雖挑而難保其不復淤隄雖築而難保其不復決探本之論固有在矣上嘉納焉至濟即達觀徐沛淤漕閱新河險阻沿黃河出豐單以求決鬻奔衝之迹洞悉利害而得其要機遂築長隄起單至沛几百四十餘里時建議者欲別遣官相度意在阻公適有旨下公計處乃復上疏其畧曰漕渠廟道口下忽淤數十里者由決河西來橫衝掣開河水入昭陽湖以致開水不復南流而飛雲橋之水時復北漫故沙停而淤也今宜加築東隄以

過入湖之路更築西隄以防黃河之衝俾其自北而南
常由故道則沙不復淤矣臣愚且拙不敢求新奇之功
不敢為苟且之計惟欲因舊以為功從省以濟事順水
性以除患故舍新河而脩舊漕者圖其易也沿黃河為
隄者防其溢也停槩派夫十數萬僅用河夫二萬餘者
恐民勞也罷雇募而行犒助者慮繼費也上復納之劉
司空麟遺公書言近日議者謂趙皮寨孫家渡不足洩
黃河怒漕渠或不免復淤柰何公復書云黃河為中原

患非一日矣智者不與水爭地惟順其勢而導之後世
或塞其決或隄其卑或疏其派皆隨時救患者也國家
漕渠為南北咽喉勢不得不與河爭地弘治初河決荆
隆口又決黃陵岡又決張秋當時嘗濬孫家渡宿遷小
河而後荆隆黃陵張秋可塞此分洩河怒之驗也况自
河南歷直隸至山東之曹縣恃長隄以禦河患亦既有
年今單豐沛為隄獨不可以捍禦乎蓋事理可據與人
力可為者如是而已若欲別求遠圖則新河之役可為

殷鑑公遂毅然行之役夫費銀不滿二萬不期年而功成沛漕流通歲運如故每河漲隄下水退沙迴民多耕作焉其後河徙成化間故道出徐州小浮橋合運河而飛雲橋道塞無復沙淤之患矣己丑秋境山河忽西徙三百步亂石絕河湍射下數仞雖虛舟不得上有冒險而下者十覆三四遠近駭懼舟戒弗行公命穿故河廣十步以通水稍截徙河逼之東兩涯下埽以漸相屬及兩埽逼河流激盪乃決入故河奔放衝滌一夕河廣一

倍二三日盡復其舊人謂禹之行水弗是過也是役也有風公終新河之緒者有謂當條新河之害以聞者公一弗從蓋公之忠不欲徇人之非以債國之是而其厚不欲揚人之短以彰己之功故功卒成而人弗病於是御史傅君炯疏公費省而成速上紓九重漕河之憂下遺一方民田之利工部尚書章公拯疏公區畫有方督理有序國之峻功一旦告成宜加陞賞以勵臣工上乃詔加公尚書俸級仍總理之任然公積勞成疾自此始

矣是年冬疏乞骸上溫旨慰留義不敢復辭事詳治河
錄辛卯春召改兵部右侍郎五日而部署災時堂屬多被
逮公以一身疲衆務收熒散之圖書防黃緣之奸弊固
有餘力又奏罷各省鎮守太監是年秋陞本部左侍郎
冬復奉勅督理仁壽宮役力疾趨事壬辰三月十九日
戊辰朝服侍上御殿傳制賜進士退朝同省集迎主賓
百餘冠裳濟濟宴會盡歡比日旻歸復接賓客罷如卧
內少休有頃則氣微微逝矣明日訃聞於朝咸驚愕以

為異旁皇赴吊天子軫哀特贈兵部尚書賜塋祭公儀
狀秀偉言辭辨正性孝友質直簡默惇慤平生言動未
嘗少越法度接人和夷而不喜諧謔無冗無比無賢愚
大小見必稱長者使人弗逆億敷然以情尤篤於故舊
鄉里後進接引不遺有德於人終不自言人有無禮未
嘗見其非口不言人過聞人有言者則嘿然凡職分當
為無不學而一無所炫視之若愚及臨大事決大疑若
庖丁理牛無不迎刃而解雅知止足不逐時進取為太

僕八年居卿貳且三考朝列鮮有同者而公裕如也平生讀書精思力究發為文章雋腴古雅詩尤清婉卓然名家所著有竹澗集若干卷嘗慮族人久而易渙乃倣古宗法作潘氏家乘僉事府君有舊廬葺之以居族人創家廟立祭規凡尊祖睦族之為罔弗至焉公生成化丙申享年僅五十有七塋武義縣牛山之原娶葉氏累封淑人前壬辰進士知和州梅澗公睦第三女性慈孝事姑姜淑人深得其歡心尤能逮下所在著聞生子徽

與永康程文德同登己丑進士任刑部主事女粹適文德封孺人庶子紹邑庠生章氏出綬葛氏出孫男四人長承祜以公蔭為太學生次承祥承禱承禔禮部侍郎甘泉湛公若水為之銘諸壙云史氏文德曰夫公可謂不近名者矣當瑾之橫也公而少自為可以不禡其爵也官滁陽則八年矣猶曰休庵居也總師而師捷矣治河而河道矣而亦既勞矣而九歲弗遷焉近名者至是乎且當發言盈庭之日一言而禮取東馬公孤可立致

也公著論寧獨秘焉近名者能之乎於乎寧抑其位而信其德不求知于人而求知于天若公者固三代之遺直也耶後之論世者庶有考於斯焉翰林院編脩文林郎經筵官子壻程文德撰

侍郎潘公祠堂記

祠在境山

潘公何祠民祠之也思也德公思公圖報無地故為祠以尸祝之也民何德公之理河不擾民不激水漕舟通利國富民安飲水者思禹不能一朝忘也然則民作之

乎民無敢作君子者聽之也君子何聽高山仰止景行
行止五音之於六律方員之於規矩前船後眼不能舍
之而他適也於戲遺愛於民遺法於後公去猶不去也
公沒猶不沒也大人君子其無尚於立德也已故可
以祠可以記公諱希曾字仲魯號竹澗浙江金華人嘉
靖八年以工部侍郎兼都察院僉都御史奉勅總理河
道祠成於十有六年之秋倡之者耆民郝端伊達等聽
之者理鹺監察御史陳公蕙洪公垣視其成者徐州整

敕兵備山東按察司副使宋君圭徐州知州陸君時望
記者州人馬津湖廣按察司僉事記已為歌歌曰於戲
公之理河也民無知公之去河也民有祠河之水兮湯
湯公之靈兮洋洋歲時伏臘兮民曷可忘



竹澗集附錄